

Kurangkan agenda peribadi

UM - 12/5/2007.

Oleh YULPISMAN ASLI

KUALA LUMPUR 11 Mei - Veteran UMNO hari ini meminta pemimpin dan ahli-ahli parti di semua peringkat mengurangkan agenda mencari kepentingan diri, sebaliknya meneruskan perjuangan memartabatkan agama dan bangsa Melayu.

Kumpulan itu juga mengingatkan ahli-ahli UMNO supaya tidak bersikap ekstrem sebaliknya terus mengekalkan kesederhanaan dalam perjuangan demi kebaikan negara dan masyarakat berbilang kaum di Malaysia.

Pengerusi Veteran UMNO, Datuk Tajuddin Ali berkata, melalui pendekatan tersebut ahli-ahli UMNO boleh memantapkan lagi perjuangan parti.

"Yang penting sekali kemakmuran masyarakat majmuk kita," katanya kepada pemberita selepas mengetuai 22 delegasi veteran UMNO melakukan kunjungan hormat kepada Presiden parti, Datuk Seri Abdullah Ahmad Badawi di Menara Dato' Onn, Pusat Dagangan Dunia Putra (PWTC) di sini, hari ini.

Dalam pertemuan lebih dua jam itu, Perdana Menteri turut memberikan penerangan mengenai pembangunan ekonomi negara kepada kumpulan terbabit.

Antara lain, Abdullah menjelaskan, kedudukan ekonomi sekarang adalah baik berikutan defisit negara berkurangan, rizab meningkat, inflasi berada di tahap 2.5 peratus, kadar pengangguran sekitar tiga hingga empat peratus, kedudukan ringgit stabil dan pertumbuhan perdagangan begitu baik.

Pada pertemuan itu, Perdana Menteri turut meminta veteran UMNO supaya bersama-sama parti dan kerajaan berusaha ke arah menstabil dan mengukuhkan politik negara.



NAIB Ketua Pemuda UMNO, Khairy Jamaluddin bersama anggota pergerakan itu pada majlis khas sempena sambutan ulang tahun UMNO ke-61 di Pusat Dagangan Dunia Putra, Kuala Lumpur, semalam.

Dalam hal ini, Tajuddin berkata, kumpulan itu sedia untuk terus aktif dan memberi khidmat dari segi buah fikiran bagi membangunkan bangsa Melayu dan negara.

"Veteran UMNO sedia memberikan sumbangan dari segi buah fikiran yang boleh dikongsi oleh generasi muda bagi

memantapkan lagi perjuangan parti.

"Peranan veteran adalah memberi pandangan dan bukan untuk membuat kacau, serta memikirkan atau mencari kedudukan dalam parti," jelasnya.

Mengenai pandangan veteran mereka tentang UMNO ketika ini pula, beliau

berkata, parti berada dalam kedudukan amat baik sekali.

"Veteran melihat UMNO dan kerajaan dalam keadaan baik. Kalau ada kepincangan, tidak mungkin ada pelaburan dan boleh pula menang pada pilihan raya kecil yang lalu," katanya.